



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

51. Kalenderwoche – ab 14. Dezember 2008

Bargheisor

Nee, wenss irschendwie gehn dud, fahr isch nisch in so Diefgaraschn nein. Aber wenn nirschendwo Bargblädze zu findn sinn, dann mussde ähm als Audofahrer in dähn sauorn Abbl beißn un in so een Bedongbungor neinfahrn. Oder - wenss e Barghaus is, dann mussde ehm noff.

Ledznendes duds off das gleische nauskomm - bloß dass ehm de Diefgaraschn noch e bißl unheimlichor sinn, als wie de Bargheisor. Weil se ehm so unnorirdisch sinn.

Das Dheador fängd an, wenssde neinfahrn dusd. Am besdn is, wenssde dann Delesgobarme hamm dusd. Wenssde ganz normale Arme hasd, mid eenor ganz normaln Länge, dann mussde dir schon fasd dähn Arm auskuchln, damid de an dähn Gnobb von dähm Bargschein-Audomadrn nankomm dusd. Wenssde e bißl ängsdlich bisd un hasd Angsd um dähn Lagg von dem Audo, un dusd nisch enge genuch nannfahrn an dähn Audomadrn, kanns sähr broblemadisch wern. Diere offmachn un ausschdeischn gehd nisch. Nochma rangschiern gehd nisch mähr, weil hinnor dir schon eenor schdehn dud un bleede guggd. Du mussd disch irschendwie aus dähm Fensdor nausschraum, damid de an dähn Gnobb kommsd. Wenssde dann endlich drinne bisd in dor Garasche, dud de Sucherei anfang. Endlich bisde findisch gewordn. Du fährsd in die Barkligge nein, abor du kannsd nisch ausschdeischn. Die Bargbuchdn sinn irschendwie viel zu enge. Die missn noch fiehr Trabis geresched sein. Die dädn guhd neinbassn. Odor dun de Vorschriftdn fiehr die Greeße von Bargbuchdn in Bargheisor doch aus dor ehmalischn schdamm?

Jednfalls mussde also eene Schdelle findn, wo meeschlichsd wenschedens off eenor Seide kee Nachbor is. Dann kommsde raus aus dem Audo.

Wennsde widdorkomm dusd, dann dud abor garandierd eenor nähm dir schdehn, dass de in dei Audo nisch mähr neinkommsd. Vorausgesedzd, du hasd dei Audo iborhaubd widdorgefundn!

Guhd, wennsdes dann gefundn hasd - einschdeischn! Das dud geling undor Offbiedung sämdlischor gymnasdischor Fähischkeedn, die de eischendlsich gahr nisch mähr hasd. Ährlisch, das Ein- un Ausschdeischn in volle Bargheisor is e Gelengischkeedsdesd vom Feinsdn.

Nu mussde disch zum Ausgang nausfidzn. Das is manschma wie in eim Labbirind! De ledzde Hirde is dann nadierhlich de Ausfahrd. Wo de dähn Bargschein in dähn Audomadn neinschdeggn mussd. Das Broblehm mid dor Länge dor Arme hammor schon abehandld. Abor nu kommsd ooch noch off Zielsischorheed an. Wennsde dähn Schlidz nisch dreffn dusd... un dei Bargschein dud womeeschlich runnorfalln... dann hasde dähn Haubdgewinn! Weil ja ooch immor, wenn dir sowas ma bassierd, schon eenor hinnor dir schdehn dud, dähr schadnfroh gaffd. Eh dass dähr dann begreifn dud, dass de zuriggschdoßn mussd, um dein Bargschein offzuhehm... da dud dähr ershdema hubn un zeischd dir een Vochl! Nee, wennsde aus so eim Barhaus widdor drausn bisd... da weeße ershd rischdisch, wie scheen de Freiheit is.

Eduard Sachsenmeyer